

SUDSKOM NAGODBOM STRANKE BIRAJU NAČIN RJEŠENJA SPORA

Sudska nagodba omogućuje očuvanje poslovne saradnje ili odnosa između stranaka u postupku. Ona je najpogodniji postupak, jer prilikom zaključenja sudske nagodbe stranke same biraju način rješenja spora i na taj način nagodba predstavlja njihov međusobni dogovor. Sudska presuda, sa druge strane, podrazumjeva samo jedno moguće rješenje spora na temelju zakona, koje uvijek ne mora pogodovati strankama.

POVJERENJE I SIGURNOST

Prednost rješenja spora između stranaka zaključenjem sudske nagodbe ogleda se u činjenici da stranke vlastitom voljom, sporazumom, rješavaju nastali spor na obostranu korist i zadovoljstvo. Ovaj postupak se sa druge strane odvija pred sudom, koji jamči valjanost takvog sporazuma, njegovu pravosnažnost i izvršnost, a strankama pomaže u iznalaženju zajedničkog rješenja. Na pripremnom ročištu, kao i tokom cijelog postupka, postupajući sudija će na način koji ne ugrožava njegovu nepristrasnost, pružiti strankama pomoć u cilju iznalaženja mogućeg sporazumnog rješenja. U tom slučaju, stranke su te koje odlučuju o sudbini tog spora i spor se okončava zaključivanjem sudske nagodbe pred prvostepenim sudom, bez daljnjeg odugovlačenja postupka.

USPJEH BEZ RIZIKA

U sudskoj nagodbi obje su stranke pobjednici jer su sklopile nagodbu od zajedničkog interesa, što sve sudionike čini zadovoljnim i omogućuje im obnovu privremeno poremećnog odnosa i njegovo zadržavanje u budućnosti. U sudskoj nagodbi isključuje se svaki rizik za stranke od eventualno nepovoljne sudske odluke, pa tako i od one u žalbenom postupku.



Sudska nagodba

Kantonalni sud u Zenici, Masarykova 50, 72000 Zenica, BiH
Telefon: +387 32 246 210, Fax: +387 32 242 305
Email: ksud-zenica@pravosudje.ba ili kantsudze@bih.net.ba
Web: <http://ksud-zenica.pravosudje.ba/>

ŠTA JE SUDSKA NAGODBA?

Sudska nagodba jedan je od manje poznatih načina rješavanja sporova u Federaciji Bosne i Hercegovine. Podrazumjeva miran, sporazuman način rješavanja sporova, koji podrazumjeva međusobni dogovor stranaka u sporu o predmetu spora. Stranke zaključuju sudsku nagodbu u pisanoj formi ugovora pred nadležnim sudom, i time rješavaju spor koji postoji između njih. Takav ugovor ima svojstvo pravosnažne presude, a u slučaju da se ugovara obaveza na neku radnju, trpljenje, činjenje, tada ima snagu izvršnog naslova. Stranke mogu zaključiti sudsku nagodbu o predmetu spora, tokom cijelog postupka, a sudska nagodba može se zaključiti u predmetima parničnog i izvanparničnog postupka, privrednih, ugovornih, radnih i porodičnih sporova, te predmeta male vrijednosti i komunalnih predmeta.

CILJ SUDSKE NAGODBE

Prvenstveni je cilj sudske nagodbe da stranke u postupku sporazumno utvrđuju da za predmet za koji se vodi sudski spor mirnim putem zaključuju nagodbu u cilju njegovog rješavanja. Slobodnom voljom, stranke same odlučuju da li će prihvatiti inicijativu suda ili same predložiti zaključivanje nagodbe, a nastali spor rješavaju na način koji je najbolji za njih. Zaključena sudska nagodba ima jednaku valjanost kao presuda.

ULOGA SUDA

Što se tiče nadležnosti, sudsku nagodbu stranke mogu zaključiti pred sudom koji je proveo prvostepeni postupak, odnosno pred drugostepenim sudom uz sudjelovanje stranaka ako se održava rasprava, kada se nagodba može zaključiti i pred tim sudom.

U postupku sud će, prilikom prvog susreta sa strankama, na način koji ne ugrožava njegovu nepristrasnost, na pripremnom ročištu, kao i tokom cijelog postupka, nastojati da stranke zakluče sudsku nagodbu. U cilju doprinosa nagodbi, sud može, kada ocijeni da je to osnovano, strankama predložiti kako da se nagode, vodeći računa o željama stranaka, prirodi spora, odnosima među strankama i drugim okolnostima. Sporazum stranaka o nagodbi unosi se u zapisnik koji stranke potpisuju.

Stranke mogu zaključiti nagodbu i tokom postupka pred drugostepenim sudom do donošenja drugostepene odluke u povodu žalbe.

ZAŠTO ODABRATI POSTUPAK SUDSKE NAGODBE

Zato što je sudska nagodba, dobrovoljan, miran, povjerljiv, ekonomičan i brz postupak. Zaključivanjem sporazuma među strankama znatno se skraćuje vrijeme trajanja sudskog postupka, izbjegavaju se brojni izdaci redovnog sudskog postupka, te nema žalbe na odluku niti žalbenog postupka, a sudska nagodba po svojim učincima izjednačena je sa pravosnažnom presudom. Sudska nagodba je privilegovana i sa aspekta plaćanja sudske takse, jer su prema Zakonu o sudskim taksama predviđene olakšice za sporove riješene sudskom nagodbom.

Nagodba se može odnositi na cijeli tužbeni zahtjev ili na jedan njegov dio. Nakon što stranke zakluče sudsku nagodbu kojom su u cijelosti riješile predmet spora, sud u postupku u kojem je nagodba sklopljena više ne može donositi nikakve odluke pa niti odluku o troškovima postupka.

Što se tiče nadležnosti, sudsku nagodbu stranke mogu zaključiti pred sudom koji je proveo prvostepeni postupak, odnosno pred drugostepenim sudom ako se održava sjednica vijeća uz sudjelovanje stranaka ili rasprava, kada se nagodba može zaključiti i pred tim sudom.